

四庫全書

集部

欽定四庫全書

集部

山谷集卷一至三

詳校官庶吉士臣胡鈺

檢討臣何思鈞覆勘

總校官進士臣朱鈐

校對官編修臣盧遂

謄錄監生臣沈啟晉

欽定四庫全書

集部三

山谷集

別集類二 宋

提要

臣等謹案山谷集三十卷別集二十卷外
集十四卷詞一卷簡尺二卷宋黃庭堅撰年
譜三十卷庭堅之孫當撰庭堅字魯直分寧
人官著作佐郎坐黨籍羈管宜州事迹具宋
史文苑傳當則朱子之門人也葉夢得避暑

錄話載黃元明之言曰魯直舊有詩千餘篇
中歲焚三之二存者無幾故名焦尾集其後
稍自喜以為可傳故復名敝帚集晚歲復刊
定止三百八篇而不克成今傳於世者尚幾
千篇云云然庭堅所自定者皆已不存其存
者一曰內集庭堅之甥洪炎所編即庭堅手
定之內篇所謂退聽堂本也一曰外集李彤
所編即邱濬藏本也一曰別集即黃芻所編

所謂內閣抄出宋蜀人所獻本也內集編于
建炎二年別集編于淳熙九年黃齋年譜則
編于慶元五年蓋外集繼內集而編別集繼
內外兩集而編年譜繼別集而編獨李彤之
編外集未著年月然考外集第十四卷送鄧
慎思歸長沙詩慎字空格注云今上御名是
外集亦編於孝宗時三集皆合詩文同編後
人註釋則惟取其詩任淵所註之內集即洪

炎所編史容所注之外集則與李彤所編次第已多有不同而李彤編外集之大意猶稍見于史注第一卷溪上吟題下惟史李溫注之別集則與黃檠所編別集大有摺拄此則原本與注本不可相無者矣又外集第十一卷以下四卷詩凡四百有奇皆庭堅晚年刪去而李彤復載入者此則任史二注本皆未之有庭堅之詩得此而後全又其中有與年

譜相應者黃當編年譜時皆一一分注某年
某事之次而今但据三集檢其目則年譜有
而本集無故此四卷尤不可廢也黃當之譜
專為考證詩文集而作故刻全集必當無刻
年譜而近日刻本則或刪節年譜或刪併卷
次或移易分類以就各體或專刻一集而不
及其全此本刻於明嘉靖中前有蜀人徐岱
序尚為不失宋本之遺非外間他刻所及也

乾隆四十六年十月恭校上

總纂官臣紀昀臣陸錫熊臣孫士毅

總校官臣陸費墀

山谷全書序

山谷者宋太史黃先生號也全書者後人萃其詩文以傳而統名之也系以年譜傳議者備考也附以伐檀集者原所自也序者書缺而復全宜有言也世傳先生之文久矣曷為而有斯刻也先生寧人也文獻於是乎徵嗣於後者存手澤吏於土者重鄉賢全書所由刻也刻久而磨滅弗修之可乎先生寓蜀之戎涪文墨甚富岱也居鄉而說之薄遊以來見夫刻者若詩集若刀筆若

精華病其散漫弗具叨按茲土訪全書於寧得故刻之
半時建昌郡丞余子載仕攝寧事購元本補之新守喬
子遷至乃竟厥工書凡若干卷請為序夫先生以文鳴
於宋與東坡並稱時人目曰蘇黃蘇亦薦曰文絕當世
行配古人天下後世信之文也行也先生所以為賢也
載諸史傳諡議者可以想見其風範後之人蓋亦難焉
不獨歸然元祐之傑而已其生平之節雖流落窮荒終
身自若非大賢而能爾耶或云文傷元氣而直取其詩

或云詩及婢妮而性類於禪淺乎其為知矣紫陽夫子
東都事略之嘆有以哉吾道千載不傳之緒至周子而
後得當時知其人品者惟山谷焉謂山谷未為知道不
可也矧孝友忠信之德本於天性不以險夷終始而渝
聖賢之道寧外是與義學之尚或有所託耳岱也觀風
先生之鄉邦表其行以勵俗求其文以傳世固職也未
敢曰知焉於全書刻且序嘉靖丙戌季冬望日後學西
蜀徐岱謹序

山谷集序

山谷全書序

巡按江西監察御史西蜀徐公以吾寧山谷先生罹史禍謫涪徙戎兩川士從之遊以名今日者有自哉不有寧也乃檄攝州盱佐余君載仕新守喬君遷梓其書以嘉惠吾人既自序矣喬君復侈其盛而徵予言以再序之予惟山谷詩文散見宇宙者最多其全者則寡初與先兄南山先生求之瓊山閣老丘公得豫章集三十有六卷訛脫未慊也最後因亡友潘南屏時用抄之內閣

有正集外集別集詞簡年譜諸集凡九十七卷乃宋蜀人所獻者或者其全而無遺也哉於是屬之前守葉君天爵梓行憂去而寢板本兩歸殘逸可恨也復抄之挾以遊四方者垂二十年非其人不授適聞是得毋欣然而畀乎而可與其須也嗚呼難得者機也易失者時也有是不授焉可乎哉沛然流布則自徐公始時哉機也而讀者以先生生於宋而為宋人乎然其文其詩其行則非宋也王直方謂其文邈然有二漢之風陳無

已謂其詩學杜甫而不為者蘇子瞻謂其行追配古人
余禹績諸人謂其饑寒窮死無愧東都黨錮是誠宋人
也哉又宋儒黃伯起稱其著作合周孔者居多而流於
莊周者無幾其語人曰讀其書而不於其本心之正大
不可泯者求之豈惟不足以知之恐亦自誤予故述之
以告人人不知以為何如其父亞夫伐檀集二卷句甚
奇崛世所謂山魃水怪著薜荔之體真黃氏審言亦閤
本附行校翻刻而一正之者庠生王朝宗查應元云嘉

靖丁亥仲春之吉賜進士出身通議大夫南京刑部右
侍郎致仕後學周季鳳謹序

山谷集序

欽定四庫全書

山谷集卷一

宋 黃庭堅 撰

賦十首

寄老庵賦

為孫莘老作

生乎今茲兮見曩之人萬物一家兮卷宇宙而無鄰橐
櫛可以為澤兮鬢鬚蒼然獨奈何俯仰以是兮吾獨立
而不陳新彼族庖之技養兮伐大觚以嘗巧風悲邛人

之宰木兮顧無所用吾斤濔濔汗汗兮黃川日夜流吾
誰疎親兮行天下以虛舟無地以受人之微纒故超世
而不避世槃礴於蝸牛之宮經行於羊豕之隧軒冕社
以為罇兮舉海門以為載觴豆於無味之味從衲子以
卒歲儻然以寓其不得已是謂無累之累何用窮山幽
谷為獨安往而非寄寄吾老於簪紱岌高位之疾顛春
秋以旅力去矣奉腴祿而彫年寄吾老於孫息厭羣維
之替替眷火宅之無安寧執枯而俱焦寄吾老於友朋

未沫平生之言人壽不能金石忽相望於鬼伯之阡伊
漢上之龐禪空諸有以為宅沈貨泉以棄責聊生涯於
緯竹維衡岳之懶叟獨金玉其言音踞燒木以燠寒投
鼻涕而無寸陰相彼宛童寓於栢松自干青雲束縛舍
翁主人不承澤螻蟻為宮薪者斧焉賓主適同無意以
為智維此意而天天申申從人以嬉寡婦之茨高明之
榱相與社而稷之訖無累於去來養生者諱盈術竅者
天門不開此其是耶非乎窮於外者反於家困乎智者

歸愚伊未嘗一用其智對萬世而德不孤若人者其在
斯乎託軒冕而鶻居無德色之可鋤殆其肆志於江湖
翁乎強為我著書無促駕青牛之車

休亭賦并

序

吾友蕭公餉濟父往有聲場屋間數不利於有司歸
教子弟以宦學而老於清江之上開田以為歲鑿池
灌園以為邊豆兒時藝木今憩其陰獨立無鄰自行
其意築亭高原以望玉笥諸山用其所以齋心服形

者名之曰休亭乞余言銘之將游居寢飯其下豫章
黃庭堅為作休亭賦曰

槃礴一軌萬物並馳西風木葉無有靜時懷蠹在心必
披其枝事時與黃澗同機世智與太行同巖飲羽於市
門之下血刃於風波之上至於行盡而不休夫如是奚
其不喪故曰衆人休乎得所欲士休乎成名君子休乎
命聖人休乎物莫之撓吾友濟父居今而好古不與不
取亦莫予敢侮將強學以見聖人而休乎萬物之祖曩

游於世也獻璞玉而取刖圖封侯而得黥驕色未鉏而
物駭機心先見而鷗鷺撫四方者倦矣迺歸休於此亭
濯纓於峽水之上游睇髮於舞雩之喬木彼玉筍之隱
君子惠我以生芻一束是謂不著而筮從無龜而吉卜

江西道院賦并序

江西之俗士大夫多秀而文其細民險而健以終訟為能由
是玉石俱焚名曰珥筆之民雖有辯者不能自解免也惟
筠為州獨不囂於訟故筠州太守號為守江西道院然與南

康廬陵宜春三郡並蒙惡聲元祐八年武陵柳侯子儀守
筠之明年也樂其俗之美使為政者不勤乃新燕居之堂榜
曰江西道院以鼓舞其國風且為高安之父老雪恥焉秋九
月遣使來告成於雙井永思堂於是為之賦其詞曰

勾吳之區維斗所直半入於楚終蝕於越有秦伯虞仲
季子之風故處士有巖穴之雍容有屈原宋玉枚乘之
筆故文章有江山之秀發吳越之君多好勇故其民
樂鬪而輕死江漢之俗多機鬼故其民尊巫而淫祀

雖郡異而縣不同其大畧不外是矣若乃高安之域豫章之別雖風氣之未遠亦美俗之可悅故柳侯下車解牛而不割未嘗發硎初不折缺則喟然歎曰江西道院名不虛生爰作新堂合陳鼓笙有斐翰墨賓贊今丞作為詩歌接民頌聲昔也憂民之憂今則樂民之樂懷僊伯之蛻蟬有勿翦之喬木製劍池之菡萏以為裳釀丹井之清泠以為酌醉而起舞父老持足恐使君之僊去而鰥寡之長失職也吾聞風行於上

而水波此天下之至文仁形於心而民服此天下之善
化豈可多為令而病民慢自設險而病民詐耶九轉丹
砂鑄鐵成金兩漢循吏鑄頑成仁我簡靜則民肅我平
易則民親今使高安之農養生於桁楊之外珥筆教訟
者傳問孝之章務耳鎖吮者深春耕之耒賣私鬪之刀
劍以為牛羞淫祠之樽俎以養親雖承平百年雨露滲
漉非二千石所以牧人者乎雖然有一於此堂密有美
樸而未聞處士之節岑蔚有於菟而不見墨客之文豈

其龜藏而自舁蠖屈而不伸者耶公試酌樽中之渌謝山川之神為余問之

蘇李畫枯木道士賦

東坡先生佩玉而心若槁木立朝而意在東山其商略終古蓋流俗不得而言其於文事補袞則華蟲黼黻醫國則盧扁和秦虎豹之有美不彫而常自然至於恢詭譎怪滑稽於秋兔之穎尤以酒而能神故其滴瀝醉餘顰申取諸造物之鑪錘盡用文章之斧斤寒煙淡墨權

奇輪困挾風霜而不栗聽萬物之皆春龍眠有隱君子
見之曰商宇宙者朝徹於一指計褚中者心醉於九九
言其不同識也戴鵬背而不帶芥烹鼠肝而腹果然言
其不同量也彼以睢睢盱盱我以踽踽凉凉則懼夫子
之獨立而矢來無鄉乃作女蘿施于木末婆娑成陰與
世宴息於其槃根作黃冠師納息於踵若新沐而晞促
阮咸以赴節按萬籟之同歸昔阮仲容深識清濁酒沈
於陸無一物可欲右琴瑟而左琵琶陶冶此族不瀦不

濁是謂竹林之曲彼道人者養蒼竹之節以玩四時鳴
槁梧之風以召衆竅其鼻間栩栩然蓋必有不可傳之
妙若予也寄櫟社以神其拙顧白鷗之樂人深一行作
吏此事便廢懷稻梁以飴老就簪紱而成禽莊生曰去
國期年見似之者而喜矣况予塵土之濁心

東坡居士墨戲賦

東坡居士遊戲於管成子楮先生之間作枯槎壽木叢
篠斷山筆力跌宕於風煙無人之境蓋道人之所易而

畫工之所難如印印泥霜枝風葉先成於習次者歟顰
申奮迅六反震動草書三昧之苗裔者歟金石之友質
已死而心在斲泥郢人之鼻運斤成風之手者歟夫惟
天才逸羣心法無軌筆與心機釋冰為水立之南榮視
其胸中無有畦畛八窗玲瓏者也吾聞斯人深入理窟
積研囊筆枯禪縛律恐此物輩不可復得公其緹衣十
襲拂除蛛塵明窗斐几如見其人

別友賦送李次翁

曩聞義於孫李指導選以見招惜予行之舒舒曰其夜
以為朝予望道於垓垣見萬物之富有恨逸駕之絕塵
又驟予以四牡喟車後之無策其四方乎索友仰雲飛
而注弋俯淵靚之沈鈎或一能之勝予忘日月之不予
謀或登吞舟之鱗或下垂天之翼手予弓而不釋恐斯
道之或息維廬江之四季三隱約於龍眠維若人之仕
蚤懷明月而麗川歲庚午而會梁語聞道之大用吸江
漢以為深累丘嶽以自重尾擊之而首應西犯之而東

抗棄旗鼓而不逐儼其陳之堂堂偉道學之崇崛增懦
夫之激昂觀出日於東方雖食焉而不吝無肯綮以自
試居自喜於餘刃彼覆却於萬方期斯言之猶信水渾
渾而進舟風剌剌而侵裘恐事親之不懽則惟是之同
憂

白山茶賦

姨母文城君作白山茶賦興寄高遠蓋以自況類楚
人之橘頌感之作後白山茶賦

孔子曰歲寒然後知松栢之後凋也麗紫妖紅爭春而
取寵然後知白山茶之韻勝也此木產於臨川之崔嵬
是為麻源第三谷仙聖所廬金堂瓊榭故是花也稟金
天之正氣非木葉之匹亞迺得骨於崑閬非乞靈於施
夏造物之手執丹青而無所用析薪之斤雖睥睨而幸
見赦高潔皓白清修閒暇徘徊冰雪之晨偃蹇霜月之
夜彼細腰之子孫與莊生之物化方坯戶以思溫故無
得而陵跨蓋將與日月爭光何苦與洛陽爭價惟是當

時而見尊顯處於瑤臺玉墀之上是以閑藏而無悶淡
然於乾楓枯柳之下江北則上徐庾江南則數鮑謝蓋
不能刻畫常娥藩飾姑射諒無地以寄言故莫傳於膾
炙况乎見素抱朴難乎郢人故徐熙趙昌舐筆和鉛而
不敢畫或謂山丹之皓質足以爭長而更霸知我如此
不幾乎罵雖瓊華明后土之祠白蓮秀遠公之社皆聲
名籍甚俗態不捨挾脂粉之氣而蘊蘭麝與君周旋其

避三舍

對青竹賦

余楚產也閱東南之竹多矣未嘗聞對青竹者也嘉
州僧從之包封見貽藝之而成乃初識之惟範圍之
內有知之物一無窮無知之物一無窮一耳一目不
能遍覽也況六合之外者乎感而賦之

竹之美於東南以節不以文也其在楚之西鬱鬱葱葱
連山繚雲也會稽之奇材任矢石斬春之澤夏簟簫笛
沅湘淚血邱岵高節慈竹相守孝竹冬茁慈姥嶰谷笙

竿篴篁長石之山一節可航猶未極其瑰怪不常也故
吳楚無竹工非無竹工婦能織緝之器兒能雞鶩之籠
也今夫筥筐簾筭棖櫨翰藩巴船百丈下漢為筥貴之
則律呂汗簡賤之則箕帚蒸薪惟所逢遭盡於斧斤美
哉斯竹黃質墨章如出杼軸織文自當解甲稅枯金碧
其相歲寒在躬又免斲烹彼其文章之種性不可致詰
剗心而求之不可得匪人匪天有物有則惟其與蓬蒿
共盡而無憾余亦不知白駒之過隙

煎茶賦

洶洶乎如澗松之發清吹皓皓乎如春空之行白雲賓
主欲眠而同味水茗相投而不渾苦口利病解膠滌昏
未嘗一日不放箸而策茗椀之勲者也余嘗為嗣直淪
茗因錄其滌煩破睡之功為之甲乙建溪如割雙井如
遽日鑄如勞其餘苦則辛螫甘則底滯嘔酸寒胃令人
失眠亦未足與議或曰無甚高論敢問其次涪翁曰味
江之羅山巖道之蒙頂黔陽之都濡高株瀘川之納溪

梅嶺夷陵之壓輒臨邛之火井不得已而去於三則六者亦可以酌免褐之甌淪魚眼之鼎者也或者又曰寒中瘠氣莫甚於茶或濟之鹽勾賊破家滑竅走水又况雞蘇之與胡麻浩翁於是酌岐雷之醪醴參伊聖之湯液斲附子如博投以焚葛僊之壘去藪而用鹽去橘而用薑不奪茗味而佐以草石之良所以固太倉而堅作強於是有胡桃松實菴摩鴨脚勃賀蘿蕪水蘇甘菊既加臭味亦厚賓客前四後四各用其一少則美多則惡

揮其精神又益於咀嚼蓋大匠無可棄之材太平非一
士之略厥初貪味雋永速化湯餅乃至中夜不眠耿耿
既作溫齊殊可屢歎如以六經濟三尺法雖有除治與
人安樂實至則煎去則就榻不游軒后之華胥則化莊
周之蝴蝶

苦笋賦

楚道苦笋冠冕兩川甘脆愜當小苦而反成味溫潤縝
密多啖而不疾人蓋苦而有味如忠諫之可活國多而

不害如舉士而皆得賢是其鍾江山之秀氣故能深雨
露而避風煙食肴以之開道酒客為之流涎彼桂班之
夢承又安得與之同年蜀人曰苦笋不可食食之動痼
疾令人姜而瘠予亦未嘗與之言蓋上士不談而喻中
士進則若信退若眩焉下士信耳而不信目其頑不可
錫李太白曰但得醉中趣勿為醒者傳

楚詞七首

龍眠操三章贈李元中

吾其行乎道渺渺兮騷弱石巖巖兮川橫日月兮在上
風吹雨兮晝冥吾其止乎曲者如几直者如矢我為直
兮棘余趾我為曲兮不如其已吾耕石田兮為芝乃三
歲兮報我饑嗣茲穡兮則以稼從子于耜兮龍眠之下
螳臂美兮當車螯螯強兮鬪虎我觀兮上下四方或錫
予兮以大武金石兮水波松栢兮雨霜有時女兮不春
我欲筮兮同牀筮告予以不好予與居兮甚媿秦人同
炙兮徒欺予予和羹兮衆吐之南山霧兮楚氛其在茲

兮斗日月撈湯兮救暵從子休兮龍眠之樾

朝百牢兮九飯黎羹不糝兮共槃而笑狐白裘兮豹舄
緼袍無裏兮亦見春予何喜兮安樂此曰有嘉人兮遺
予履發十襲兮示予與予武兮合度使羿兮隅立使離
朱兮詔之若人兮無鵠離朱茫然兮羿韞弓牧牛兮于
鼻牧羊兮不歧有若人兮可與歸因子問塗兮龍眠之
蹊

濂溪詩并序

春陵周茂叔人品甚高胸中灑落如光風霽月好讀書雅意林壑初不為人窘束世故權輿仕籍不卑小官職思其憂論法常欲與民決訟得情而不喜其為少吏在江湖郡縣蓋十五年所至輒可傳任司理叅軍運使以權利變具獄茂叔爭之不能得投告身欲去使者斂手聽之趙公悅道號稱好賢人有惡茂叔者趙公以使者臨之甚威茂叔處之超然其後廼寤曰周茂叔天下士也薦之於朝論之於士大夫終其

身其為使者進退官吏得罪者自以不寬中歲乞身
老於湓城有水發源於蓮花峯下潔清紺寒下合於
湓江茂叔濯纓而樂之築室於其上用其平生所安
樂嬉水而成名曰濂溪與之遊者曰溪名未足以對
茂叔之美雖然茂叔短於取名而惠於求志薄於徵
福而厚於得民非於奉身而燕及煢嫠陋於希世而
尚友千古聞茂叔之餘風猶足以律貪則此溪之水
配茂叔以永久所得多矣茂叔諱惇實避厚陵藩諱

請名改惇頤二子壽燾皆好學承家求余作濂溪詩
思詠潛德茂叔雖仕宦三十年而平生之志終在丘
壑故余詩詞不及世故猶髣髴其音塵

溪毛秀兮水清可飯羹兮濯纓不漁民利兮又何有於
名絃琴兮觴酒寫溪聲兮延五老以為壽蟬蛻塵埃兮
玉雪自清聽潺湲兮鑒澄明激貪兮敦薄非青蘋白鷗
兮誰與同樂

津有舟兮蕩有蓮勝日兮與客就閒人聞欸音兮不知

何處散髮醉高荷為蓋兮倚芙蓉以當伎霜清水寒兮
舟著平沙八方同宇兮雲月為家懷連城兮珮明月魚
鳥親人兮野老同社而爭席白雲蒙頭兮與南山為伍
非夫人攘臂兮誰余敢侮

王聖涂二亭歌

并序

忠州太守王聖涂罷忠州春秋六十有六將告老於
朝而休於營丘以書抵黔州告其同年生黃魯直曰
營丘有叟將自此歸矣舍旁作二亭以休餘日子為

我名且歸以夸父老魯直名其一曰休休上言事下
言德也其一曰冥鴻言公自此去矰繳遠矣聖涂喜

曰子盍為我歌

營丘之下有宅有田黎藁兮觴豆耘耔兮為年鷄栖埒
兮羊豕在牧課兒子兮藝松菊炙背兮牆東夢覆舟兮
漕且風洋之回兮可以駕孫甥一作男扶輿兮父老同社

洋之水兮可以舟入鷗鳥兮與之游一世兮蜉蟻桑榆
兮慙可收從此休兮公誰黃髮之休偉長松兮卧龍蛇

閱千歲兮不改其柯震雷不驚兮誰欲休之以蜩蛭下
有錦石兮可用栝勺雲月供帳兮萬籟奏樂石子磊磊
兮澗谷縱橫春月桃李兮士女傾城時雨霖兮忽若海
潦收無事兮我以觀萬物之情兒時所藝兮桃李纖纖
隨世風波兮吹而北南昔去兮拱把今歸兮與天參與
古人兮合契樹如此兮我何以堪鴻鴈磬兮或在洲渚
有心於粒兮弋者所取飛冥冥兮渺萬里而絕去藪澤
之羅者兮官予落羽

官一作觀

木之彬彬

并序

曹公所禮三人孔融禰衡陽狂嫚侮操且疑且信故以衡假手於黃祖融晚乃覆巢獨楊修材慧數解隱語又探其不言者發之最先得罪雖其父公雅故不足以貫死嗟乎修黃犢子有致遠材一怒其臂死於龍車之轍曾不知隰子之伐木耶田常與大夫隰子登臺四望齊邑南向而蔽於隰子之喬木成子不言隰子歸使人伐木斧斤離散創則止之相室曰變之

亟也曰田子將成大事惡人知其微令不伐木未深
忌也知人之所不言其忌深矣故曰知微者兵在其
頸求福者禡藏其穎雖然隰子猶有所未立也與百
里奚策虞公而去之豈可同年語哉感二三子行事
作木之彬彬

木之彬彬非取異於人可宮室則斬則伐可籩豆則撝
則擷草之茸茸非求顯於世中芻牧則刈則鉏中醫和
則剝則枯非以其材故耶是非之歧利害薰蒸嗟人道

之多患彼草木尚無情吾嘗觀於若人矣巧於辨人拙
於自辨好動乎天機不周乎時變罪莫慘於德有心禍
莫深於心有見罪不在德心其蟲賊禍不在心見其髡
箱之人也皦皦自鮮行於衆汙之前曉曉不讓立乎衆
埤之上積小不當是以亡其大當悲夫羿注矢以當物
十嘗中其七八引鏃鉞以自殘駭兕虎之竊發禍集於
所忽怨棲於榮名易其言則害智用其智則害明為君
子則奈何獨見曉於冥冥

予欲金玉汝贈黃從善

江山複重兮朋友失長處幽篁兮隔離天日鳥聲無人
兮我友來即久矣不聞德人之言兮為余發藥嘉若人
兮甚好修蘭薰而時發兮水剛德而用柔有璞連城方
謨匠兮忍其與斗筭議之螫吾手而不砭兮舉百體而
棄之為民父母兮灼子之膚何能忍顧白日臨辰兮臣
何愛不與俱來古之人償責言兮雖九死其猶未悔虹
氣貫斗牛兮豈用俗人之町畦予愛蘭而莫與予佩兮

曰斯其不情帝關九牡兮照下土孔明予將觀東海兮
蛙說予以坎井盍嘗視吾寶兮茲有重於岑鼎予欲金
玉汝兮汝既金玉揭日月以適四方兮殆而按劍以為
戮鴈以不鳴烹木以材而斲天下皆羿兮矢來無鄉惟
應以無名之樸

明月篇贈張文潛

天地具美兮生此明月陞白虹兮貫朝日工師告余曰
斯不可以為珮棄捐櫝中兮三歲不會霜露下兮百草

休抱此耿耿兮與日星遊
山中兮招招耕而食兮無
卹榛艾蓁蓁前吾牛兮疾
不可更扶淺耕兮病歲深
耕兮石嬰耜登山兮臨川
雉得意兮魚樂小風兮吹
波從其友兮尾尾日下兮
川逝射雉兮喪余一矢佳
人兮潔齊悵何所兮行媒
南山有葛兮葛有本我羞
鋪兮以君之鉏來

悲秋

為知命弟作

有美一人兮臨清秋而太息
傷天形之缺然兮與有足

者同堂而並席儻嘗獲罪於天兮使而至於斯極夫陰
凝而陽化兮冲氣飪而為和駢拇所以為少枝指所以
為多謂天任汝以道兮曾是形畸而貌獨天厭棄汝兮
修汝德而謂何中無所考此耿耿兮獨遡風而浩歌歌
曰父耶母耶人乎天乎才之為祥固不若不才之全乎
非天地之私兮又非父母之願也慨伏思而不得兮夢
漂漂而行遠逆真人於軒臺兮請端策而徵衍遇水盈
之坎坎兮得山麓而為蹇雖御良而馬服兮猶往蹇而

來連艮之初六來告休兮艮其趾而无咎如風日之過
河兮人謂守水而為耗知水性之循環兮曾何損益之
足道蛇百足之狂攘兮夔蹠蹕以行地蛇虺蔓延不自
好兮謂風蓬蓬而無似物憐物之無窮兮目尚為心之
僕隸夫精於形器之表兮視四體百骸其在外予將執
汝手兮游乎浩蕩之會憑天津而濯髮兮攬日月以為
珮嗟不知去來之為我兮天下莫予之為對恐路遠而
多岐兮聊贈汝以指南將雍容於勝日兮嘗試為汝而

妄談

山谷集卷一

欽定四庫全書

山谷集卷二

宋 黃庭堅 撰

古詩五十一首

贈別李次翁

四言

利欲薰心隨人翕張國好駿馬盡為王良不有德人俗
無津梁德人天游秋月寒江映徹萬物玲瓏六窗於愛
欲泥如蓮生塘處水超然出泥而香孔竅穿穴明冰其

相維乃根華其本含光大雅次翁用心不忘日問月學
旅人念鄉能如斯蓮汜可小康在俗行李密密堂堂觀
物慈哀泣民愛莊成功萬年付之面牆草衣石質與世
低昂

次韻答鼂無咎見贈

補之

翕翕一日炎眈眈萬年永四海仰首觀頌復歸根靜時
雨瀉玉除潢流漲天井性不耐衣冠入門踈造請煮餅
卧北窗保此已徼幸空餘見賢心思渴望梅嶺

次韻答張文潛惠寄

末

短褐不磷緇文章近楚辭未識想風采別去令人思斯
文已戰勝凱歌偃旂旂君行魚上冰忽復燕哺兒學省
得佳士惟來費符移方觀追金玉如許遽言歸南山有
君子握蘭懷令姿但應潔齋俟勿詠無生詩

同錢志仲飯藉田錢孺文官舍

景祥

帝藉開千畝農功先九州王孫守耒耜吏隱極風流永
夏豐草木五雲衛郊丘牛羊卧籬落賓客解衣裳汲井

金匱要略卷二
羞熱啜挽溪供甘柔倒斂收蓮的剖蚌煮鴻頭野日草
光合水風荷氣浮稻畦下白鷺林樾應鳴鳩主人發清
賞況復佳同游歸扇障小雨真成一賜休

次韻子瞻贈王定國 鞏

遠志作小草鼃衣生陵屯但為居移氣其實何足言名
下難為人醜好隨手翻百年炊未熟一垓蟻追奔夏日
蓬山永戎葵茂牆藩王子吐佳句如蠶絲出盆風姿極
灑落雲氣畫壘樽屬有補袞章自當寵頻繁鄙夫無他

能上車問寒溫唯思窮山去抱犢長兒孫

次韻張詢齋中春晚

學古編簡殘懷人江湖永非無車馬客心遠境亦靜挽
疏夜雨畦煮茗寒泉井春去不窺園黃鸝頗三請立朝
無物望補外儻天幸想乘滄浪船濯髮晞翠嶺

補外一作得邑

又石本
得邦

送范德孺知慶州

純粹

乃翁知國如知兵塞垣草木識威名敵人開戶玩處女

掩耳不及驚雷霆平生端有活國計百不一試薶九京
阿兄兩持慶州節十年麒麟地上行潭潭大度如卧虎
邊人耕桑長兒女折衝千里雖有餘論道經邦政要渠
妙年出補父兄處公自才力應時須春風旂旂擁萬夫
幕下諸將思草枯智名勇功不入眼可用折箠笞羌胡

題王黃州墨跡後

掘地與斷木智不如機春聖人懷餘巧故為萬世宗世
有斲泥手或不待郢工往時王黃州謀國極匪躬朝聞

不及夕百壬避其鋒九鼎安磐石一身轉秋蓬浮雲當
日月白髮照秋空諸君發蒙耳汲直與臣同

題王仲弓兄弟巽亭實

大隗七聖迷許由連城重里中多佳樹與世作梁棟市
門行清渠溪水可抱甕暈飛城東南隱几撫羣動人境
要俱爾我乃得大用烏衣之雲孫昆弟不好弄木末風
雨來卷箔醉賓從事常超然觀樂與賢者共人登斷壠
求我自歸鴻送溪毛亂錦禰侯蟲響機綜世紛甚崢嶸

胸次欲空洞讀書開萬卷謀國妙百中儻無斲鼻工聊
付曲肱夢

送劉士彥赴福建轉運判官

秋葉雨墮來冥鴻天資高車馬氣成霧九衢行滔滔中
有寂寞人靈府扃鑰牢西風持漢節騎從嚴弓刀維閩
七聚落惇獨困吏饗土獎禾黍惡水煩鱗介勞南驅將
仁氣百城共一陶察人極涇渭問俗及豚羔官閒得勝
日杖屨之林皋人間閱忠厚物外訪英豪

次韻劉景文登鄴王臺見思五首

季孫

黃濁歸大壑，漣漪遶重城。
西風一橫笛，金氣與高明。
歸鴉度晚景，落鴈帶邊聲。
平生知音處，別離空復情。

舊時劉子政，憔悴鄴王城。
把筆已頭白，見書猶眼明。
平原秋樹色，沙麓暮鐘聲。
歸鴈南飛盡，無因寄此情。

繫匏兩相憶，極目十餘城。
積潦干斗極，山河皆夜明。
白壁按劍起，朱弦流水聲。
乖逢四時爾，木石了無情。

茗花浮甕坑，酒泛酌宜城。
路尋西九曲，人似漢三明。
千

戶非無相五言空有聲何時郭池晚照影寫閒情

公詩如美色未嫁已傾城嫁作蕩子婦寒機泣到明綠
琴蛛網遍絃絕不成聲想見鴝夷子江湖萬里情

柳閣展如蘇子瞻甥也其才德甚美有意於學故
以桃李不言下自成蹊八字作詩贈之

柳君文甚武

甚武一作武甚

睥視萬人豪

睥視一作睥視

老氣鼓不作

卷旗解弓刀上為朝陽桐下為澗溪毛囊中有美實期
子種蟠桃

浮陽愧嘉魚道旁多苦李古來賢達人不爭咸陽市吾

子富春秋日月東趨

一作逝

水潛聖有玉音聞道而已矣

霜威能折綿風力欲冰酒勤子來訪道枵然我何有寢
興與時俱由我屈伸肘飯羹自知味如此是道不

任世萬鈞重載言以為軒空文誤來世聖達欲無言咸
池浴日月深宅養靈根胸中浩然氣一家同化元

陸沈百世師寄食魯柳下我今見諸孫風味窺大雅大
雅久不作圖王勿成霸偉哉居移氣蘭鮑在所化

聖學魯東家恭惟同出自乘流去本遠遂有作書肆日
中駕肩來薄晚常掉臂徒翼終無贏歸矣求已事

清潤玉泉冰高明秋景晴妙年勤翰墨銀鈎爛縱橫藍
田生美璞未琢價連城思為萬乘器柱下貴晚成

八方去求道渺渺困多蹊歸來坐虛室夕陽在吾西君
今秣高馬風駕先鳴雞慎勿取我語親行乃不迷

次韻李之純少監惠硯周

黃公山下黃雞秋持節卹刑曾少休小人負弩得開道

掃葉張欽林巖幽相傳有石非地產列仙持來自羅浮
酒酣步出雲雨上南撫方城西嵩丘林端乃見石空洞
猛獸巋巖踞上頭鳥道免迂謀挽致萬牛不動六丁愁
道家蓬萊見仙伯我亦洗湔與清流探囊贈硯頗宜墨
近出黃山非遠求乃知此山自才美物欲致用當窮搜
迷邦故令成器晚不琢元非匠石羞

次韻曾子開舍人游藉田載荷花歸

肇

維王調玉燭時夏雨我田壁挂蒼龍骨溜渠故濺濺三

推勸根本百穀收早堅官司極齋明崇丘見升煙繫馬
西門柳憶聽去夏蟬剥炎珠走盤釣魚柳貫鮮掃堂延
枕簟公子氣翩翩自爾欲繼往阻心如壅泉紫微樂暇
日披襟詠風漣紅妝倚荷蓋水鏡寫明蠲美物亦有實
翦房助加籩珠宮紫貝闕足比水府仙鬱鬱冠蓋宅追
犇易彫年能從物外賞真是區中賢仍聞載後乘籠燭
照嬋娟

次韻子瞻題郭熙畫秋山

黃州逖客未賜環江南江北飽看山玉堂卧對郭熙畫
發興已在青林間郭熙官畫但荒遠短紙曲折開秋晚
江村煙外雨脚明歸鴈行邊餘疊巘坐思黃柑洞庭霜
恨身不如鴈隨陽熙今頭白有眼力尚能弄筆映窗光
畫取江南好風日慰此將老鏡中髮但熙肯畫寬作程
五日十日一水石

詠李伯時摹韓幹三馬次蘇子由韻簡伯時兼寄

李德素

公麟
案

太史瑣窗雲雨垂試開三馬拂蛛絲李侯寫影韓幹墨
自有筆如沙畫雖絕塵超日精爽際若失其一望路馳
馬官不語臂指揮乃知仗下非新羈吾嘗覽觀在垆馬
駑駘成列無權奇緬懷胡沙英賢質一雄可將十萬雌
決非廐養所成就天驥生駒人得知千金市骨今何有
士或不價五穀皮李侯畫隱百僚底初不自期人誤知
戲弄丹青聊卒歲身如閱世老禪師

次韻子瞻和子由觀韓幹馬因論伯時畫天馬

于闐花驄龍八尺看雲不受絡頭絲西河驄作蒲萄錦
雙瞳夾鏡耳卓錫長楸落日試天步知有四極無由馳
電行山立氣深穩可耐珠羈白玉羈李侯一顧歎絕足
領略古法生新奇一日真龍入圖畫在垆羣雄望風雌
曹霸弟子沙苑丞喜作肥馬人笑之李侯論幹獨不爾
妙盡骨相遺毛皮翰林評書乃如此賤肥貴瘦渠未知
況我平生賞神俊僧中云是道林師

俊一作駿

次韻答王眷中

寅

有身猶縛律無夢到行雲
俗裏光塵合胸中涇渭分
我
寒二南秀一見空馬羣
夸士慕鍾鼎寒儒守典墳
吾欲
超萬古乃如負山蚊
能來商略此跌坐對鑪芬

奉同子瞻韻寄定國

風雲開古鏡淮海熨冰紉
王孫醉短舞羅襪步微瀾
老
驥心雖在白鷗盟已寒
斯人氣金玉視世一鼠肝
南歸
脫蟲蠶入對隨乳鷺
忍以口語去鼓船下驚湍
收身薄
冰釋置枕泰山安
后土花藥麗海門
天水寬伐木思我

友知人良獨難遙憐鬚鬢綠猶復耐悲歡

謝黃從善司業寄惠山泉

錫谷寒泉攜石俱并得新詩蠶尾書急呼烹鼎供茗事
晴江急雨看跳珠是功與世滌羶腥令我屢空常晏如
安得左轡清潁尾風鑪煮茗卧西湖

次韻錢穆父贈松扇

颺

銀鉤玉唾明璽紙松簾輕涼并送似可憐遠度憤溝澮
適堪今時褫襮子丈人玉立氣高寒三韓持節見神山

應得安期不死草使我蟬蛻塵埃間

戲和文潛謝穆父松扇

猩毛束筆魚網紙松拊纖扇清相似動搖懷袖風雨來
想見僧前落松子張侯哦詩松韻寒六月火雲蒸肉山
持贈小君聊一笑不須射雉穀黃間

次韻王炳之惠玉板紙

虎伯

王侯鬚若綠坡竹哦詩清風起空谷古田小牋惠我百
信知溪翁能解玉鳴碁千杵動秋山裏糧萬里來輦轂

儒林丈人有蘇公相如子雲再生蜀往時翰墨頗橫流
此公歸來有邊幅小楷多傳樂毅論高詞欲奏雲門曲
不持歸掃蘇公門乃令小人今拜辱去騷甚遠文氣卑
畫虎不成書勢俗董狐南史一筆無誤掌殺青司記錄
雖然此中有公議或辱五鼎榮半菽願公進德使見書
不敢求君米千斛

奉答謝公靜與榮子邕論秋元規孫少述詩長韻
謝公遂如此宰木已三霜無人知句法秋月自澄江二

子學邁俗窺杜見牖窗試斲郢人鼻未免傷手創解胥
與竹萌乃不美羊腔自往見謝公論詩得濠梁世方尊
兩耳未敢築受降丹穴鳳凰羽風林虎豹章小謝有家
法聞此不聽將相思北風惡歸鴈落斜行

戲答俞清老道人寒夜三首

索索葉自雨月寒遙夜闌馬嘶車鐸鳴羣動不遑安有
人夢超俗去髮脫儒冠平明視清鏡政爾良獨難

聞道一稊米出身縛簪纓懷我伐木友寒衾夢丁丁富

貴但如此百年半曲肱早晚相隨去松根有茯苓

牧羊金華山早通玉帝籍至今風低草鹹鹹見白石金
華風煙下亦有君履跡何為紅塵裏頷鬚欲雪白

奉和文潛贈無咎篇末多見及以既見君子云胡
不喜為韻

龜以靈故焦雉以文故翳本心如日月利欲食之既後
生玩華藻照影終沒世安得八紘置以道獵衆智

談經用燕說束素諸儒傳濫觴雖有罪未派瀾九縣張

侯真理窟堅壁勿與戰難以口舌爭水清石自見

野性友麋鹿君非我同羣文明近日月我亦不如君十

載長相望逝川水汙汙何當談絕倒茗椀對鑪薰

北寺鎖齋房陳鑰時一啓晁張楚然來連壁照書几庭

柏鬱蔥蔥紅榴罅多子時蒙吐佳句幽處萬籟起

先皇元豐末極厭士淺聞只今舉秀孝天未喪斯文晁

張班馬首崔蔡不足云當今橫筆陣一戰靜楚氛

張侯窘炊玉僦屋得空壚但見索酒郎不見酒家胡雖

肥如瓠壺胸中殊不羸何用知如此大采似於菟
荆公六藝學妙處端不朽諸生用其短頗復鑿戶牖譬
如學捧心初不悟已醜玉石恐俱焚公為區別不
吾友陳師道抱獨門掃軌晁張作薦書射雉用一矢吾
聞舉逸民故得天下喜兩公陣堂堂此士可摩壘

予瞻詩句妙一世乃云效度堅體蓋退之戲效孟
郊樊宗師之比以文滑稽耳恐後生不解故以韻
道之

我詩如曹檜淺陋不成邦公如大國楚吞五湖三江赤
壁風月笛玉堂雲霧窗句法提一律堅城受我降枯松
倒澗壑波濤所舂撞萬牛挽不前公乃獨力扛諸人方
嗤點渠非晁張雙但懷相識察牀下拜老龐小兒未可
知客或許敦龐誠堪壻阿巽買紅纏酒缸

留王郎純亮

世弼

河外吹沙塵江南水無津骨肉常萬里寄聲何由頻我
隨簡書來顧影將一身留我左右手奉承白頭親小邦

王事略蟲鳥聲無人王甥解鞍馬夜語雞喚晨母慈家
人肥女慧男垂紳有田為酒事豚韭及秋春生涯得如
此舊學更光新索去何草草少留慰艱勤百年才一炊
六籍經幾秦要知胸中有不與跡同陳郢人懷妙質聊

欲運吾斤

白頭一作白髮

送王郎

酌君以蒲城桑落之酒泛君以湘纍秋菊之英贈君以
黔川點漆之墨送君以陽關墮淚之聲酒澆胸中之磊

魂菊制短世之頽齡墨以傳千古文章之印歌以寫一
家兄弟之情江山萬里頭俱白骨肉十年眼終青連牀
夜語雞戒曉書囊無底談未了有功翰墨乃如此何恨
遠別音書少炊沙作糜終不飽鏤冰文章費工巧要須
心地收汗馬孔孟行世日果果有弟有弟力持家婦能
養姑供珍鮭兒大詩書女絲一作桑麻公但讀書煮春茶

古風二首上蘇子瞻

江梅有佳實託根桃李場桃李終不言朝露借恩光孤

芳忌皎潔冰雪空自香古來和鼎實此物升廟廊歲月
坐成晚煙雨青已黃得升桃李盤以遠初見嘗終然不
可口擲置官道傍但使本根在棄捐果何傷

青松出澗壑十里聞風聲上有百尺絲下有千歲苓自
性得久要為人制顏齡小草有遠志相依在平生醫和
不並世深根且固蒂人言可醫國何用太早計小大才
則殊氣味固相似

山谷集卷二

欽定四庫全書

山谷集卷三

宋 黃庭堅 撰

古詩五十首

贛上食蓮有感

蓮實大如指分甘念母慈共房頭
臟臟更深兄弟思實中有么荷拳
如小兒手令我憶衆雛迎門索梨
棗蓮心政自苦食苦何能甘甘食
恐腊毒素食則懷慙蓮生於

泥中不與泥同調
食蓮誰不甘知味
良獨少吾家雙井
塘十里秋風香安
得同懷子歸製芙
蓉裳

贈鄭郊

高居大士是龍象
草堂丈人非熊羆
不逢壞衲乞香飯
唯見白頭垂釣絲
鴛鴦終日愛水鏡
菡萏晚風凋舞衣
開徑老禪來煮茗
還尋密竹逕中歸

寄裴仲謨

綸

交游二十年義等
親骨肉風雨漂我
巢公亦未有屋寄

聲來問安足音到空谷我家輦轂下薪桂炊白玉在官
與影俱衣綻髮曲局天機行日月春事勤草木念公篤
行李野飯中道宿驚沙卷旂烏尾訛城角騷騷家治
具夫子且歸沐作書寄後乘為我追臣僕起居太夫人

并問相與睦

烏尾訛城角一本作
烏尾城角謾謾音縮

送鄭彥能宣德知福昌縣

僅

往時河北盜橫行白晝驅人取

一作八

城郭唯聞不犯鄭

冠氏犬卧不驚民氣樂祇今化兵作鋤耰田舍老翁百

不憂銅章去作福昌縣山中讀書民有秋福昌愛民如
父母當官不擾萬事舉用才之地要得人眼中虛席十
四五不知諸公用心許魯恭卓茂可人否

顯聖寺庭枸杞

仙苗壽日月佛界承露雨誰為萬年計乞此一抔土扶
踈上翠蓋磊落綴丹乳去家尚不食出家何用許政恐
落人間采剝四時苦養成九節杖持獻西王母

平陰張澄居士隱處三詩

仁亭

無心經世網有道藏丘山養生息天黥藝木印歲寒德
人牆九仞強學窺一班張侯大雅質結髮闢儒關奇羸
或諧偶老大嘗難難築亭上雲雨日月轉朱欄牀敷聽
萬籟我家頗寬閒牧牛有坦塗亡羊自多端市聲鑿午
枕常以此心觀

復庵

春糧出求人行李彌宇宙久客渺愁人馬饑僕夫瘦歸

來一丘中萬事不改舊未忝鋤其驕牛羊鞭其後隱几
天籟寒六鑿忽通透

亨泉

水德通萬物發源會時亨伏坎非心願成川且意行棲
遲林丘下欲濯無塵纓杖藜逢載酒一瓢酌餘清

雙井茶送子瞻

人間風日不到處天上玉堂森寶書想見東坡舊居士
揮毫百斛瀉明珠我家江南摘雲腴落磴霏霏雪不如

為公喚起黃州夢獨載扁舟向五湖

和答子瞻

一月空回長者車
報人問疾遣兒書
翰林貽我東南句
窗間默坐得玄珠
故園溪友膾腹腴
遠包春茗問何如
玉堂下直長廊靜
為君滿意說江湖

子瞻以子夏丘明見戲聊復戲答

化工見彈大早計
端為失明能著書
邇來似天會事發
淚睫見光猶隕珠
喜公新賜紫琳腴
上清虛皇對久如

請天還我讀書眼願載軒轅訖鼎湖

省中烹茶懷子瞻用前韻

閣門井不落第二竟陵谷簾定誤書思公煮茗共湯鼎
蚯蚓竅生魚眼珠置身九州之上腴爭名醖中沃焚如

但恐次山胃磊塊終便

平聲

酒舫石魚湖

元次山石魚湖歌曰石魚湖似

洞庭夏水欲滿君山青疾風三日作大浪不能廢人運酒舫

以雙井茶送孔常父

武仲

校經同省並門居無日不聞公讀書故持茗椀澆舌本

要聽六經如貫珠心知韻勝舌知腴何似寶雲與真如
湯餅作魔應午寢慰公渴夢吞江湖

常父荅詩有煎點徑須煩綠珠之句復次韻戲荅

小鬟雖醜巧妝梳掃地如鏡能檢書欲買娉婷供煮茗
我無一斛明月珠知公家亦闕掃除但有文君對相如
政當為公乞如願作牋遠寄宮亭湖

牋一作書

戲呈孔毅父

仲平

管城子無食肉相孔方兄有絕交書文章功用不經世

何異絲窠綴露珠校書著作頻詔除猶能上車問何如
忽憶僧牀同野飯夢隨秋鴈到東湖

以圃茶洮州綠石研贈無咎文潛

晁子智囊可以括四海張子筆端可以回萬牛自我得
二士意氣傾九州道山延閣委竹帛清都太微望冕旒
貝宮胎寒弄明月天網下罩一日收此地要須無不有
紫皇訪問富春秋晁無咎贈君越侯所貢蒼玉璧可烹
玉塵試春色澆君胃中過秦論斟酌古今來活國張文

潛贈君洮州綠石含風漪能淬筆鋒利如錐請書元祐
開皇極第八思齊訪落詩

晁張和荅秦覲五言予亦次韻

山林與心違日月使鬢換儒衣相詬病文字奉娛玩自
古非一秦六籍蓋多難詩書或發冢熟念令人惋秦君
銳本學驥子已血汗相期驂天衢伯樂嘗一盼士為欲
心縛寸勇輒尺懦要當觀此心日照雲霧散扶踈萬物
影宇宙同璀璨置規豈惟君亦自警弛慢

常父惠示丁卯雪十四韻謹同韻賦之

春皇賦上瑞來寧黃屋憂下令走百神大雲庇九丘風
聲將仁氣豔豔生瓦溝寒花舞零亂表裏照皇州千門
委圭璧曉日不肯收元年冬無澤穴處長螟螽兩宮初
旰食補袞獻良籌有道四夷守無征萬邦休耆年秉國
論涇渭極分流輟耒入班品逸民盡歸周股肱共一體
間不容戈矛人材如金玉同美異剛柔政須衆賢和乃
可踈共咬改弦張敝法病十九已瘳王指要不匿蝕非

日月羞桑林請六事河水問九疇天意果然得玄功與
吾謀此物有嘉德占年在麥秋近臣知天喜玉色動冕
旒儒館無他事作詩配崇丘

次韻答曹子方雜言

輔

憂鵬入歸來杞國痛天摧玉堂却對鄧公直北門喚仗
聽風雷山川悠遠莫浪許富貴崢嶸今鼎來萬壑松聲
如在耳意不及此文生哀

和荅子瞻和子由常父憶館中故事詩

二蘇上連壁三孔立分鼎少小看飛騰中年嗟遠屏風
撼鵲鴿枝波寒鴻鴈影天不掇斯文俱來集臺省日月
黃道明桃李清晝永時平少犴獄地禁絕鼃黽頗懷修
故事文會陳果茗當時羣王府人物殊秀整下直馬闌
闌杯盤具俄頃共醉凌波襪誰窺投轄井天網極恢疎
道山非簿領何曾歸閉門燈火坐閒冷欲觀太平象復
古望公等賤子託後車當煩煮湯餅

謝公定和二范秋懷五首邀予同作

惺

西風一葉脫迹已不可掃巷有白馬生朝回焚諫草誰
云事君難是亦父子間所要功補袞不言能犯顏
四會有黃令學古著勲多白頭對紅葉柰此搖落何雖
懷斲鼻巧有斧且無柯安得五十絃奏此寒士歌

采蓮涉江湖采菊度林藪插鬢不成妍誰憐飛蓬首平
生耦耕地風雨深稂莠謝公遂如此永袖絕絃手
往日孫陽翟才可任遺補擊強如摧枯食蘄不知苦屬
者缺諫垣時論或未許儻可假一邦使民作鄒魯

用智常恨耄用決常恨早推轂天下士誠心要傾倒海
宇日清明廟堂勤灑掃何為陳師道白髮三徑草

謝送礪賜壑源揀芽

喬雲從龍小蒼壁元豐至今人未識壑源包貢第一春
紺奩礪香供玉食睿思殿東金井欄甘露薦椀天開顏
橋山事嚴庀百局補袞諸公省中宿中人傳賜夜未央
雨露恩光照宮燭左丞似是李元禮好事風流有涇渭
肯憐天祿校書郎親敕家庭遣分似春風飽識大官羊

不慣腐儒湯餅腸搜攪十年燈火讀令我胃中書傳香
已戒應門老馬走客來問字莫載酒

補袞一作袞司

以小團龍及半挺贈無咎并詩用前韻為戲

我持玄圭與蒼璧以暗投人渠不識城南窮巷有佳人
不索賓郎常晏食赤銅茗椀雨斑斑銀粟翻光解破顏
上有龍文下碁局擔囊贈君諾已宿此物已是元豐春
先皇聖功調玉燭晁子胃中開典禮平生自期莘與渭
故用澆君磊塊胃莫令鬢毛雪相似曲几團蒲聽煮湯

煎成車聲繞羊腸
鷄蘇胡麻留渴羌
不應亂我官焙香

肥如瓠壺鼻雷吼
幸君飲此勿飲酒

擔囊一本
作搖囊

次韻子由績溪病起被召寄王定國

種萱盈九畹
蘇子憂國病炎蒸
卧百戰山立有餘勁
斯人廊廟器不合從遠屏
江湖搖歸心白髮侵老境
艱難喜歸來如晴月生
嶺仍懷阻歸舟風水蛟鱷橫
補袞諫官能用儒
吾道盛上書詆平津
蠹藁初記省至今民社
計非事頰舌競方采立
本朝獻納繼晨暝
人材包新舊

王度濟寬猛必開曲突謀滿慰傾耳聽斯文呂與張泉
下亦蘇醒天與四門闢國勢九鼎定身得遭太平分甘
守閒冷天津十年面相見頎而整何時及國門休暇過
煮茗燒燈留夜語鴻鴈看對影但恐張羅地頗復多造
請維此禮部公寒泉甕舊井謫去久羸瓶召還汲脩綆
太任決齋宮陛下天統慶日月進亨衢經緯寒耿耿西
走已和我南遷無哀郢誰言兩逐臣朝轡天街並王子
竄炎洲萬死保軀命還家頗故紅信亦抱淵靜稅屋待

車音掃門親帚柄行當懷書傳載酒求是正端如嘗橄
攬苦過味方永

祕書省冬夜宿直寄懷李德素

曲肱驚夢寒皎皎入牖下出門問何祥岑寂省中夜姮
娥攜青女一笑粲萬瓦懷我金玉人幽獨秉大雅古來
絕朱紵蓋為知音者同牀有不察而況子在野獨立占
少微長懷何由寫

次韻荅邢惇夫

居實

為山不能山過在一簣止渥洼騏驎兒墮地志千里岷
江初濫觴入楚乃無底將升聖人堂道固有廉陛邢子
好少年如世有源水方求無津涯不作蛙井喜兒中兀
老蒼趣造甚奇異過閱王公門袖中有漫刺別來阻河
山望遠每障袂斯文向千載有志常寡遂後生文楚楚
照影若孔翠不應太玄草晞價咸陽市雨作枕簟秋官
閒省中睡夢不到漢東茗椀乃為祟聞君肺渴減頗復
佳食寐讀書得新功來鴈寄一字

奇異一
作奇偉

次韻張仲謀過酺池寺齋

詢

十年醉錦幄醺醺照金沙
歌眠春風底不去留君家是
時應門兒紫蘭茁其牙
只今將弟妹嬉戲牽羊車
忽書滿窗紙整整復斜斜
平生悲歡事頭緒如亂麻
苟禄無補報幾成來食嗟
喜君崇名節青雲似可涯
我夢江湖去釣船刺蘆花
江濱開園宅畦蔗時梨
楂夢驚如昨日炊玉困京華
公來或藜羹愛我不疵瑕
深念煩鄉里忍窮禁貸賒
夜談簾幕冷霜月動金蛇
即是桃李月春蟲

語交加我亦無酒飲一室可盤蝸要公共文字朱墨勦
舛差非復少年日聲名取嫖嫖諸阮有二妙能詩定自
嘉何時來煮餅蟹眼試官茶

送謝公定作竟陵主簿

謝公文章如虎豹至今斑斑在兒孫竟陵主簿極多聞
萬事不理專討論澗松無心古鬚鬣天球不琢中粹溫
落筆塵沙百馬奔劇談風霆九河翻胸中恢疎無怨恩
當官持廉且不煩吏民欺公亦可忍慎勿驚魚使水渾

漢濱耆舊今誰存
駟馬高蓋徒紛紛
安知四海習鑿齒
拄笏看度南山雲

贈送張叔和

張侯溫如鄒子律
能令陰谷黍生春
有齊先君之季女
十年擇對無可人
箕帚掃公堂上塵
家風孝友故相親
廟中時薦南澗蘋
兒女衣袴得補紉
兩家俱為白頭計
察公與人意甚真
吏能束縛老姦手
要使鰥寡無顰呻
但送此光還照已
平生倦學皆日新
我提養生之四印

君家所有更贈君百戰百勝不如一忍萬言萬當不如
一默無可簡擇眼界平不藏秋毫心地直我肱三折得
此醫自覺兩踵生光輝團蒲日靜烏吟時鑪薰一炷試

觀之

日靜一作風靜

次韻秦觀過陳無已書院觀鄙句之作

師道

陳侯大雅姿四壁不治第碌碌盆盎中見此古壘洗薄
飯不能羹牆陰老春薺唯有文字性萬古抱根抵我學
少師承坎井可窺底何因蒙賞味相享當牲醴試問求

志君文章自有體玄鑰鎖靈臺渠當為公啓

性惟有文字一作文

工字

次韻子瞻送顧子敦河北都運二首

臨

儒者給事中顧公甚魁偉經明往行河商略頗應史勞
人又費乏國計安能已成功渠有命得人斯可喜似聞
阻饑餘惡少驚邑里啓鑰探珠金奪懷取姝美部中十
盜發一二書奏紙西連魏三河東近齊四履此豈小事
哉何但行治水使民皆農桑乃見真儒耳

今代顧虎頭骨相自雄偉不令長天官亦合丞御史能
貧安四壁無愠可三已昨來立清班國士相顧喜何因
將使節風日按千里汲黯不居中似非朝廷美大任錄
萬事御坐留諫紙發政恐傷民天步薄冰履蒼生憂其
魚南畝多被水公行圖安集信目勿信耳

餞子敦席上奉同孔經父八韻

文仲

日永知槐夏雲黃喜麥秋同朝國士集賜沐吏功休祇
園冠蓋地清與耳目謀晴雲浮茗椀飛電落文楸一客

衆主人醉此顧虎頭虎頭持龍節排河使東流厥田惟
上上桑麻十數州計功不汗馬可致萬戶侯

龍節一作漢節

次韻寄晁以道

說之

河漢牛與女咫尺不得語歡然共秋盤以茲不忘故我
友在天末問天許見否雲雨隔九關日月不我與念公
坐臞禪守心如縛虎頗思攜法喜舉案饁南畝不聞犯
齋收猶聞畫眉詡良為鼻祖來渠伊為伴侶我有桂溪
刀聊憑東風去

次以道韻寄范子夷子默

正平
正思

鼓缶多秦聲琵琶作胡語是中非神竒根器如此故范
公秉文德斷國極可否至今筦樞機大度而少與蟬媽
世有人風壑嘯兩虎小心學忠孝鄙事能壠畝持論不
遽篠奉身謝誇詡頗知城南園文會英俊侶何當休沐
歸懷茗就煎去

僧景宗相訪寄法王航禪師

抱牘稍退鳬驚行倦禪時作橐駝坐忽憶頭陀雲外人

金華先生集卷之三
三
閉門作夏與僧過一絲不掛魚脫淵萬古同歸蟻旋磨
山中雨熟瓜芋田喚取小僧休乞錢

送李德素歸舒城

僧夏莫問塗麥秋宜煮餅北寺旬休歸長廊六月冷簟
飜寒江浪茶破蒼壁影李侯為我來遽以歸期請青衿
廢詩書白髮違定省荒畦當鉏灌蠹簡要籤整挽衣不
可留決去事幽屏天恢獵德網日饒養賢鼎此士落江
湖熟思令人癭胷中吉祥宅膜外榮辱境婆娑萬物表

藏刃避繁肯人生要當學安燕不徹警古來惟深地相
待汲脩綆

謝王仲至惠洮州礪石黃玉印材

欽

洮礪發劒虹貫日印章不琢色蒸栗磨礪頑鈍印此心
佳人持贈意堅密佳人鬢彫文字工藏書萬卷曾次同
日臨天閑豢真龍新詩得意挾雷風我貧無句當二物
看公到海取明月

題松下淵明

南渡誠草草長沙想艱難松風自度曲我琴不須彈遠
公香火社遺民文字禪雖非老翁事幽尚亦可觀客來
欲開說觴至不得言

開一作問

次韻子瞻詠好頭赤圖

李侯畫骨不畫肉筆下馬生如破竹秦駒雖入天仗圖
猶恐真龍在空谷精神權奇汗溝赤有頭赤烏能逐日

安得身為漢都護三十六城看歷歷

不畫肉一作亦畫肉天仗一作天馬

有頭赤烏一作自有赤烏

詠伯時虎脊天馬圖

筆端那有此千里在胷中
四蹄雷電去一顧馬羣空
誰能乘此物超俗駕長風
逸材歸轡勒歲在執徐同

雷電一作

雷電

詠伯時象龍圖

上黨良家子挽強如屈肘
三十學春秋豈為莎車首
誰言馮光祿不如甘延壽
雖無千戶封乃得六龍友

題竹石牧牛

野次小崢嶸幽篁相依綠阿童三尺簪御此老叡鯨石
吾甚愛之勿遣牛礪角牛礪角尚可牛鬪殘我竹


觀伯時畫馬

儀鸞供帳饗蟲行翰林濕薪爆竹聲風簾官燭淚縱橫
木穿石槃未渠透坐窗不遑令人瘦貧馬百駁逢一豆
眼明見此五花驄徑思著鞭隨詩翁城西野桃尋小紅

記夢

衆真絕妙擁靈君曉然夢之非紛紜窗中遠山是眉黛

席上榴花皆舞裙
借問琵琶得聞否
靈君色莊妓揺手
兩客爭棋爛斧柯
一兒壞局君不呵
杏梁歸燕空語多
奈此雲窗霧閣何



山谷集卷三

欽定四庫全書

集部
山谷集卷四至
七

詳校官庶吉士臣胡鈺

檢討臣何思鈞覆勘

總校官進士臣朱鈐

校對官編修臣盧遜

謄錄監生臣王英紱

欽定四庫全書

山谷集卷四

宋 黃庭堅 撰

古詩五十首

和荅外舅孫莘老

西風挽不來殘暑推不去出門厭鞞帽稅駕喜巾屨道
山鄰日月清樾深牖戶同舍多望郎閒官無窘步少監
巖壑姿宿昔廊廟具行趨補衮職黼黻我王度歸休飲

熱客觴豆愆調護浩然養靈根勿藥有神助寄聲舊僚
屬訓誥及七箸尚憐費諫紙玉唾灑新句北焙碾玄璧
谷簾煮甘露何時臨書几剥芡談至暮

次韻子瞻送李豸

驥子墮地追風日未試千里誰能識習之實錄葬皇祖
斯文如女有正色今年持橐佐春官遂失此人難塞責
雖然一闕有奇耦博懸於投不在德君看巨浸朝百川
此豈有意潢潦前願為霧豹懷文隱莫愛風蟬蛻骨仙

次韻子瞻和王子立風雨敗書屋有感

婦翁不可撾王郎非嬌客十年為從學苦淡共堙厄燕
雀嗤鴻漸犬羊睨麟獲遇逢涇渭分臉夢春冰釋平生
五車書才吐二三策已作謗薰天金朱果何益君窮一
窻下風雨更削跡詩工知學進詞苦見意迫俗情傲秦
贅婦舍不煖席南治從東家不聞被嘲劇師儒並世難
日月過箭疾公今未有田把筆耕六籍

次韻子瞻寄眉山王宣義

參軍但有四立壁初無臨江千木奴白頭不是折腰具
桐帽棕屨稱老夫滄江鷗鷺野心性陰壑虎豹雄牙鬚
鷓鴣作裘初服在猩血染帶鄰翁無昨來杜鵑勸歸去
更得把酒聽提壺當今人材不乏使天上二老須人扶
兒無飽飯尚勤書婦無複禪且著襦社甕可漉溪可漁
更問黃雞肥與癯林間醉著人伐木猶夢官下聞追呼
萬釘圍腰莫愛渠富貴安能潤黃壚

聽宋宗儒摘阮歌

翰林尚書宋公子文采風流今尚爾自疑耆域是前身

囊中探丸起人

一作九

死貌如千歲枯松枝落魄酒中無

定止得錢百萬送酒家一笑不問今餘幾手揮琵琶送

飛鴻促絃賒醉驚客起寒蟲催織月籠秋獨鴈叫羣天

拍水楚國羈臣放十年漢宮佳人嫁千里深閨洞房語

恩怨紫燕黃鸝韻桃李楚狂行歌驚市人漁父擘舟在

葭葦問君枯木著朱繩何能道人意中事君言此物傳

數姓玄璧庚庚有橫理閉門三月傳國工身今親見阮

仲容我有江南一丘壑安得與君醉其中曲肱聽君寫

松風

琵琶一作阮咸

次韻文潛同遊王舍人園

移竹淇園下買花洛水陽風煙二十年花竹可迷藏九
衢流車馬相值各匆忙豈有道邊宅靜居如寶坊幅巾
延客酒妙歌小紅裳主人有班綴衣拂御爐香常恐鴟
鵂鳴百草為不芳故作龜曳尾頗深漆園方初開蝸牛
廬中置師子牀買田宛丘間江漢起濫觴今此百畝宮

冬溫夏清涼身閒閱世故宇靜發天光安肯聲利場牽
黃臂老蒼張侯筆瑞世三秀麗齋房作詩盛推賞明珠
計斛量掃花坐晚吹妙語益難忘重游樊素病捧心不
能粧來日猶可追聽我歌楚狂

次韻定國聞蘇子由卧病績溪

炎洲冬無冰十月雷虺虺及春虐癘行用人祭非鬼巫
師司民命藥石不入市溪弩潛發機土風甚不美蘇子
卧江南感嘆中夜起聞道病在牀食魚不知旨寒暑戰

胃中士窮有如此此公天機深爵祿心已死養生遺形骸觀妙得骨髓后皇時嘉橘中歲多成枳佳人何時來為天啓玉齒前被瘴霧姿朝趨去天咫諸公轉鴻鈞國器方薦砥矢詩寫予心莊語不加綺

博士王揚休輓密雲龍同事十三人飲之戲作

商雲蒼壁小盤龍貢包新樣出元豐王郎坦腹飯牀東太官分物來婦翁棘園深鎖武成宮談天進士雕虛空鳴鳩欲雨喚雌雄南嶺北嶺宮徵同午憲欲眠視濛濛

喜君開包碾春風注湯官焙香出籠非君灌頂甘露椀
幾為談天乾舌本

荅黃冕仲索煎雙井并簡揚休

裳

江夏無雙乃吾宗同舍頗似王安豐能澆茗椀湔袂我
風袂欲挹浮丘翁吾宗落筆賞幽事秋月下照澄江空
家山鷹爪是小草敢與好賜雲龍同不嫌水厄幸來辱
寒泉湯鼎聽松風夜堂朱墨小燈籠惜無纖纖來捧椀
唯倚新詩可傳本

再答冕仲

丘壑詩書雖數窮
田園芋栗頗時豐
小桃源口雨繁紅
春溪蒲稗沒鳬翁
投身世網夢歸去
摘山鼓聲雷隱空
秋堂一笑共燈火
與公草木臭味同
安用茗澆磊塊胃
他日過飯隨家風
買魚貫柳雞著籠
更當力貧開酒椀
走謁鄰翁稱子本

戲荅陳元興

軒

平生所聞陳汀州
蝗不入境年屢豐
東門拜書始識面

鬢髮幸未成老翁官饗同盤厭腥膩茶甌破睡秋堂空
自言不復蛾眉夢枯淡頗與小人同但憂迎笑花枝一作
粧紅夜窻冷雨打斜風秋衣沉水換薰籠銀屏宛轉復
宛轉意根難拔如薤本

再荅元輿

君不能入身帝城結子公又不能擊強有如諸葛豐法
當憔悴百寮底五十天涯一秃翁問君何自今為郎便
殿作賦聲摩空偶然樽酒相勞苦牛鐸調與黃鍾同安

得朱輻各憑熊江南樓閣白蘋風勸歸啼鳥曉窻籠男
兒邂逅功補袞烏倦歸巢葉歸本

次韻冕仲考進士試卷

少來迷翰墨無異蟲蠹木諸生程藝文承詔當品目牀敷
設箱篚賦納忽數束變名混甲乙騰寫失句讀晝窻過
白駒夜几跋紅燭釣深思嘉魚攻璞願良玉談天用一
律押韻厭重複絲布澁難縫快意忽破竹聖言禪曲學
割袞綴邪幅注金無全巧竊發或中鵠翟公辟廳老薪

樵茂械撲御史威降霜行私不容粟吏部提英鑒片善
蒙采錄博士刈其楚銓量頗三復因人享成事賤子真
碌碌

過白駒一
作愛白駒

演雅

桑蠶作繭自纏裹珠蜚結網工遮邏燕無居舍經始忙
蝶為風光勾引破老鶻銜石宿水飲穉蜂趨衙供蜜課
鵲傳言語安得閒雞催晨興不敢卧氣陵千里蠅附驥
枉過一生蟻旋磨蟲聞湯沸尚血食雀喜宮成自相賀

晴天振羽樂蜉蝣空穴祝兒成螺贏蛭轉九賤蘇合
飛蛾赴燭甘死禍井邊蠹李糟苦肥枝頭飲露蟬常餓
天螻伏隙錄人語射工含沙須影過訓狐啄屋真行怪
蠨蛸報喜太多可鸕鷀密伺魚蝦便白鷺不禁塵土浣
絡緯何嘗省機織布穀未應勤種播五技鼯鼠笑鳩拙
百足馬蛇憐鼈跛老蚌胎中珠是賊醯雞瓮裏天幾大
螳螂當轍恃長臂熠燿宵行矜照火提壺猶能勸沽酒
黃口只知貪飯顆伯勞饒舌世不問鸚鵡纔言便闕鎖

春蛙夏蜩更嘈雜土蚓壁蟬何碎瑣江南野水碧於天

中有狎鷗閒似我

狎鷗一作白鷗

戲荅趙伯充勸莫學書及為席子澤解嘲

叔盍延賞

平生飲酒不盡味五鼎餽肉如嚼蠟我醉欲眠便遣客
三年窺牆亦面壁空餘小來翰墨場松煙兔穎傍明窻
偶隨兒窻洒墨汁衆人許在崔杜行晚學長沙小三昧
幻出萬物真成狂龍蛇起陸雷破柱自喜竒觀繞繩牀
家人罵笑寧有道汚染黃素敗粉牆誠不如南鄰席明

府蛛網鎖硯蝸書梁懷中探丸起九死才術頗似漢太
倉感君詩句喚夢覺邯鄲初未熟黃梁身如朝露無牢
強玩此白駒過隙光從此永明書百卷自公退食一爐
香

戲書秦少游壁

觀

丁令威化作遼東白鶴歸朱顏未改故人非微服過宋
風退飛宋父擁篲待來歸誰饋伯勞鸚鵡妃秦氏烏生
八九子雅烏之兄畢逋尾憶炊門牡烹伏雌未肯增巢

令汝棲莫愁野雉踈家雞但願主人印累累

次韻孫子實寄少游

端

薛宣欲吏雲季氏或招閔此公胷中秋萬物被收攬賣
藥偶知名草玄非近準才難不易得志大略細謹士生
要引殺天地為蓋軫驥來鹽車驂井下短絆引難甘呼
爾食聊寄粲然覲誰能借前籌還婦用束縕吾聞調羹
鼎異味及粉糧豈其供王羞而棄會稽笋

次韻荅秦少章乞酒

觀

朝事鞍馬早吏曹文墨拘初無尺寸補但與友朋踈豈
知簞瓢子卧起一牀書炙背道堯舜雪屋相與娛步出
城東門野鳥吟廢墟頗知富貴事勢窮心亦舒詩來獻
窮狀水餅嚼冰蔬斗酒得醉否枵腹如瓠壺亦可召西
舍侯嬴非博徒

贈秦少儀

觀

汝南許文休馬磨自衣食但聞郡功曹滿世名藉藉渠
命有顯晦非人作通塞秦氏多英俊少游眉最白頻聞

鴻鴈行筆皆萬人敵吾蚤知有覲而不知有覲少儀袖
詩來剖蚌珠的歷乃能持一鏃與我箭鋒直自吾得此
詩三日卧向壁挽士不能寸推去輒數尺才難不其然
有亦未易識

此詩一作挽士一作挽來

次韻子實題少章寄寂齋

虛名誤壯夫今古可笑閔屍裏萬里歸書載五車攜安
知衡門下身與天地準秦晁兩美士內行頗修謹余欲
造之深抽琴去其軫寄寂喧闕間此道

一作有汲引獄

戶聞笳榜市聲雜嘲鞭二生對曲肱圭玉發石蘊小大
窮鵬鷁短長春椿一作付椿一作付欲聞寂時聲黃鍾在龍筩

送少章從翰林蘇公餘杭

東南淮海惟揚州國士無雙秦少游欲攀天關守九虎
但有筆力迴萬牛文學縱橫乃如此故應當家有季子
時來誰能力作難鴻鴈行飛入道山斑衣兒啼真自樂
從師學道也不惡一作目使新年勝故年即如常在郎
罷前

便糴王丞送碧香酒用子瞻韻戲贈鄭彥龍

食貧好飲嘗自嘲日給上尊無國相
大農部丞送新酒
碧香竊比王家釀應憐坐客竟無羶
更遭官長頗譏謗
銀杯同色試一傾排遣春寒出幃帳
浮蛆翁翁盃底滑
坐想康成論泛盜重門著闕不為君
但備惡客來仇餉
送新一
作肯送

詠史呈徐仲車積

諸葛見益州釋耒荅三顧川流恨未平
武功原上路杜

微對諸葛輿致但求去傾心倚經綸坐上漫書疏白鷗
渺兼葭霜鶻在指呼借問諸葛公何如迎主簿

宿舊彭澤懷陶令

潛魚願深渺淵明無由逃彭澤當時沉冥一世豪司
馬寒如灰禮樂外金刀歲晚以字行更始號元亮淒其
望諸葛抗髯猶漢相時無益州牧指揮用諸將平生本朝心
歲月閱江浪空餘詩語工落筆九天上向來非無人此友獨可
尚屬予剛制酒無用酌杯盞欲招千載魂斯文或宜當

卧陶軒

為晁無咎作

陶公白頭卧宇宙一北窻但聞窻風雨平陸漫成江
外金扛九鼎把菊醉胡牀城南晁正字國器無等雙日
月麗宸極大明朝萬邦假版未通班曉嚴夢逢逢萬卷
曲肱裏胷中湛秋霜亦有好事人叩門提酒缸欲眠不
遣客真處更難忘

次韻吳宣義三徑懷友

佳眠未知曉屋角聞晴哢萬事頗忘懷猶牽故人夢采

卷之八
七
蘭秋蓬深汲井短綆凍起看冥飛鴻乃見天宇空甚念
故人寒誰省機與綜往者天一方日月老賓送往者不
可言古栢守翁仲

送劉季展從軍鴈門二首

劉郎才力耐百戰蒼鷹下韝秋未晚千里荷戈防甲馬
十年讀書厭藜莧試尋北產汗血駒莫殺南飛寄書鴈
人生有祿親白頭可令一日無甘饌

石硤谷中玉子瘦金剛窟前藥草肥仙家耕耘成白壁

道人煮掘起風痲絳囊璀璨思盈斗竹畚香甘要百圍
到官莫道無來使日日北風鴻鴈歸

題宛陵張待舉曲肱亭

仲蔚蓬蒿宅宣城詩句中人賢忘巷陋境勝失途窮寒
菹書萬卷零亂剛直習偃蹇勲業外嘯歌山水重晨鷄
催不起擁被聽松風

送張天覺得登字

張侯起巴渝翼若垂天鵬歷詆漢諸公霜風拂觚稜去

國行萬里淡如雲水僧歸來頭蓋

一作亦

白小試不盡能

湖海尚豪氣有人議陳登持節上三晉典刑寄哀矜公
家有閒日禪窟問香燈因來叙行李斬寄老崖藤

戲和荅禽語

南村北村雨一犁新婦餉姑翁哺兒田中啼鳥自四時
催人脫袴著新衣著新替舊亦不惡去年租重無袴著
和邢惇夫秋懷十首

殘暑已做衰好風方來歸未能踈團扇頗複製秋衣高

蟬遽如許長吟送落暉相戒趣女功莎蟲能表微

曩時高唐客暮雨朝行雲陰居懷天匹楚觀夢紛紜我
欲觀光儀齋明炷爐薰天高萬物肅誰為帝子魂

七均師無聲五和常主淡芸芸觀此歸一德貫真濫夢

臨秋水魚蝦避窺瞰明月本無心誰令作寒鑑

觀此歸一

作歸
此妙

王度無畦畛包荒用馮河秦收鄭渠成晉得楚材多用
人當其物不但軸與邁六通而四闢玉燭四時和

相如用全趙留侯開有漢名登泰山重功略天下半讓
頗封韓彭事成羣疑泮天道常曲全小智驚後患

慶州名父子忠勇橫八區許身如稷契初不學孫吳荷
戈去防秋面皺鬢欲踈雖折千里衡豈若秉事樞

謝公蘊風流詩作鮑照語絲蟲縈草紙筆力挾風雨萬
里投諫書石交化豺虎四方用賢髦先成泉下土

今日呂號州堂堂古遺直許國輸九死補天鍊五色頗
修諫員缺人壽無金石西風壯士

一作夫

淚多為程顥滴

吾友陳師道抱瑟不吹竽文章似揚馬歛唾落明珠固
窮有膽氣風壑嘯於菟秋來入詩律陶謝不枝梧

邢子卧北窓吟秋意少悰讀書用意苦嘔血驚乃翁安
得和扁輩為浣學古胃肺熱今好否微涼生井桐

次韻子瞻題無咎所得與可竹二首粥字韻戲嘲
無咎人字韻詠竹

十字供籠餅一水試茗粥忽憶故人來壁間風動竹舍
前粲戎葵舍後荒首著此郎如竹瘦十飢九不肉

地下文夫子風流絕此人能和晚煙色幻出歲寒身馬
鬣松成拱鸞溪墨尚新應懷斲泥手去作竹林神

次韻文潛休沐不出二首

風塵車馬逐得失兩關心惟有張仲蔚門前蓬蒿深自
公及歸沐畢願詩書林塙東作走馬萬里氣駸駸

文潛善畫

馬

與世自少味閉關非有心戎葵一笑粲露井百尺深著
書洒風雨枯筆束如林蘇公歎妙墨逼人太駸駸

和游景叔月報三捷

師
旗

漢家飛將用廟謀復我匹夫匹婦讎真成折箠禽胡月
不是黃榆牧馬秋幄中已斷匈奴臂軍前可飲月氏頭
願見呼韓朝海上諸將不用萬戶侯

謝景叔惠冬笋雍酥水梨三物

玉人憐我長蔬食走送厨珍不自嘗秦牛肥膩酥勝雪
漢苑甘寒梨得霜冰底斲春生笋束豹文解籜饌寒玉
見他桃李憶故園饒獠應殘遠窻竹

再荅景叔

女三為粲當獻王三珍同盤乃得嘗甘泉下繞藜苴腸
令我詩句挾風霜小人食珍敢取足都城一飯炊白玉
賜錢千萬民猶饑雷後排簷凍銀竹

出城送客過故人東平侯趙景珍墓

令

朱顏苦

一作欲

留不肯住白髮政爾欺得人嬋娟去作誰

家妾意氣都成一聚塵今日牛羊上邱壟當時近前左
右嗔花開鳥啼荊棘裏誰與平章作好春

寄劇氏倉官王仲弓

嘯臺有佳人玄髮鑑笄珥登高歌一曲聽者傾城市門
無行媒迹草木倚憔悴人物方眇然誰能委圭幣

山谷集卷四

欽定四庫全書

山谷集卷五

宋 黃庭堅 撰

古詩七十首

考試局與孫元忠博士竹間對窻夜聞元忠誦書
聲調悲壯戲作竹枝歌三章和之

朴

南窻讀書聲伊吾北窻見月歌竹枝我家白髮問烏鵲
他家紅粧占蛛絲

屋山啼鳥兒當歸
玉釵罥蛛郎馬嘶
去時燈火正月半
階前雪消萱草齊

勃姑夫婦喜相喚
街頭雪泥即漸乾
已放游絲高百尺
不應桃李尚春寒

效王仲至少監詠姚花用其韻四首

映日低風整復斜
綠玉眉心黃神遮
大梁城裏雖罕見
心知不是牛家花

九疑山中萼綠華
黃雲承轡到羊家
真詮蟲蝕詩句斷

猶託餘情開此花

仙衣襞積駕黃鸝草木無光一笑開人間風日不可耐
故待成陰葉下來

湯沐冰肌照春色海牛押簾風不開直言紅塵無路入
猶傍蜂須蝶翅來

戲答王定國題門兩絕句

非復三五少年日把酒償春頰生紅白鷗入羣頗相委
不謂驚起來賓鴻

頗知歌舞無窮鑿我心塊然如帝江花裏雄蜂雌蝶
同時本自不作雙

荅許覺之惠桂花椰子茶盃二首

彦先

萬事相尋榮與衰故人別來鬢成絲欲知歲晚在何許
唯說山中有桂枝

碩果不食寒林梢割而器之如懸匏故人相見各貧病
猶可烹茶當酒肴

戲荅陳季常寄黃州山中連理松枝二首

慥

故人折松寄千里想聽萬壑風泉音誰言五鬣蒼煙面
猶作人間兒女心

老松連枝亦偶然紅紫事退獨參天金沙灘頭瑣子骨
不妨隨俗鬢嬋娟

姨母李夫人墨竹二首

深閨淨几試筆墨白頭腕中百斛力榮榮枯枯皆本色
懸之高堂風動壁

小竹扶疎大竹枯筆端真有造化爐人間俗氣一點無

健婦果勝大丈夫

王才元惠梅花三種皆妙絕戲荅三首

棧

城南名士遣春來三月乃見臘前梅定知鎖著江南客

故放綠梢春晚回

梢一作陰

舍人梅塢無關鎖攜酒俗人來未曾舊時愛菊陶彭澤

今作梅花樹下僧

病夫中歲屏桮杓百葉緇梅觸撥人拂殺官黃春有思

滿城桃李不能春

殺一作掠

王稚川既待一作得官都下有所盼未歸予戲作林

夫人歎乃歌二章與之竹枝歌本出三巴其流在

湖湘耳歟乃乃湖南歌也

歟音襍
乃音藹

花上盈盈人不歸
春下簾簾實已垂
臘雪在時聽馬嘶
長安城中花片飛

從師學道魚千里
蓋世成功黍一炊
日日倚門人不見
看盡林烏反哺兒

次韻子瞻子由題懋寂圖二首

松舍風雨石骨瘦法窟寂寥僧定時李侯有句不肯吐
淡墨寫出無聲詩

龍眠不似虎頭癡筆妙天機可並時蘇仙漱墨作蒼石
應解種花開此時

劉晦叔許洮河綠石研

昱

久聞岷石鴨頭綠可磨桂溪龍文刀莫嫌文吏不知武
要試飽霜秋兔毫

寺齋睡起

元圃池寺睡起二首其一
東字韻見第九卷

小黠大癡螳捕蟬有餘不足獲憐蛇退食歸來北窻夢

一江春月起魚船

春月一作風月

王立之承奉詩報梅花已落盡次韻戲荅

直方

南枝北枝春事休榆錢可穿柳帶柔定自沈郎作詩瘦

不應春能生許愁

沈郎一作庾郎

自門下後省歸卧酺池寺觀盧鴻草堂圖

黃塵逆帽馬辟易歸來下簾卧書空不知繡鞍萬人立

何如盧郎駕飛鴻

頤軒詩六首

并序

高君素作頤軒請予賦詩予為說其義曰在易之頤
觀頤自求口實其傳曰觀頤觀其所養也自求口實
觀其自養也單豹巖棲谷飲有孺子之色而虎攻其
外張毅擎跽曲拳養人問之譽而疾攻其內養虎者
不以全物與之牧羊者去其敗羣視其後者而鞭之
養鷹者飢之是謂觀其所養之性也庖丁不以膚祭
嬰其解牛之刀痾僂丈人不以萬物易蜩之翼匹夫

之志不可奪於三軍之帥是謂觀其自養觀其所養
盡物之性也觀其自養盡已之性也詩云如切如磋
如琢如磨求盡性而已君素樂善能賢將求學問日
新之功故作頤軒以養其正吉乃以觀頤自求口實
六字作詩以勸戒之

金石不隨波松竹知歲寒冥此芸芸境迴向自心觀
知足是靈龜無厭乃朵頤虛心萬物表寒暑自四時
無外一精明六合同出自公能知本原佛亦不相似

辱莫辱多欲樂莫樂無求人生強學耳萬古一東流

樞機要發遲飲食減

一作戒

味厚漁人溺於波君子溺於

口

涇流不濁渭種桃無李實養心去塵緣光明生虛室

賈天錫惠寶薰乞詩予以兵衛森畫戟燕寢凝清

香十字作詩報之久失此藁偶於門下後省故紙

中得之

險心游萬仞躁欲生五兵隱几香一炷靈臺湛空明

晝食烏窺臺宴坐日過砌俗氛無因來煙霏作輿衛
石蜜化螺甲棋櫺煮水沈博山孤煙起對此作森森
輪囷香事已郁郁著書畫誰能入吾室脫汝世俗械
賈侯懷六韜家有十二戟天資喜文事如我有香癖
林花飛片片香歸銜泥燕閉閣和春風還尋蔚宗傳
公虛采蘋宮行樂在小寢香光富發聞色敗不可稔
牀帷夜氣馥衣桁晚煙凝瓦溝鳴急雪睡鴨照華燈
雉尾映鞭聲金鑪拂太清班近聞香早歸來學得成

衣篝麗紈綺有待乃芬芳當念真富貴自薰知見香

戲詠臘梅二首

金蓓鎖春寒惱人香未展雖無桃李顏風味極不淺
體薰山麝臍色深薔薇露披拂不滿襟時有暗香度

題子瞻寺壁小山枯木

爛腸五斗對獄吏白髮千丈濯滄浪却來獻納雲臺表
小山桂枝不相忘

題子瞻枯木

折衝儒墨陳堂堂書入顏楊鴻鴈行
胷中元自有丘壑故作老木蟠風霜

題伯時畫揩痒虎

猛虎肉醉初醒時揩磨苛痒風助威
枯楠未覺草先低木末應有行人知

題伯時畫觀魚僧

橫波一網腥城市日暮江空煙水寒
當時萬事心已死猶恐魚作故時看

題伯時畫頓塵馬

竹頭搶地風不舉
文書堆案睡自語
忽看高馬頓風塵
亦思歸家洗袍袴

題伯時畫嚴子陵釣灘

平生久要劉文叔
不肯為渠作三公
能令漢家重九鼎
桐江波上一絲風

題劉將軍鴈

滕王蛺蝶雙穿花
東丹胡馬歆胡沙
祁連將軍一筆鴈

生不並世俱名家

戲題小雀捕飛蟲畫扇

小蟲心在一啄間得失與世同輕重丹青妙處不可傳
輪扁斲輪如此用

題畫孔雀

枕柳暗天蕉葉長終露文章嬰世網故山桂子落秋風
無因雄雌青雲上

睡鴨

山雞照影空自愛孤鸞對鏡不作雙天下真成長會合
兩鳬相倚睡秋江

小鴨

小鴨看從筆下生幻法生機全得妙自知力小畏滄波
睡起晴沙依晚照

竹枝詞二首

並跋

撐崖挂谷蝮蛇愁入箐攀天猿掉頭鬼門關外莫言遠
五十三驛是皇州

浮雲一百八盤縈落日四十九渡明鬼門關外莫言遠
四海一家皆弟兄

古樂府有巴東三峽巫峽長猿鳴三聲淚霑裳但以
抑怨之音和為數疊惜其聲今不傳予自荊州上峽
入黔中備嘗山川險阻因作二疊傳與巴娘令以竹
枝歌之前一疊可和云鬼門關外莫言遠五十三驛
是皇州後一疊可和云鬼門關外莫言遠四海一家
皆弟兄或各用四句入陽關小秦王亦可歌也

予既作竹枝詞夜宿歌羅驛夢李白相見於山間
曰予往謫夜郎於此聞杜鵑作竹枝詞三疊世傳
之不予細憶集中無有請三誦乃得之

一聲望帝花片飛萬里明妃雪打圍馬上胡兒那解聽
琵琶應道不如歸

竹竿坡面蛇倒退摩圍山腰胡孫愁杜鵑無血可續淚
何日金雞赦九州

命輕人鮮甕頭船日瘦鬼門關外天北人墮淚南人笑

青壁無梯聞杜鵑

行次巫山宋楸宗遣騎送折花厨醞

知命

攻許愁城終不開
青州從事斬關來
喚得巫山強項令
插花傾酒對陽臺

萬州下巖

空巖靜發鐘聲響
古木倒掛藤蘿昏
莫道蒼崖鎖靈骨
時應持鉢到諸村

次浮塘驛見張施州小詩

知命

歎恩施州成老醜當年玉雪瑩相照舊時去天一尺五
今日萬里聽猿叫

題驢瘦嶺馬鋪

知命

老馬飢嘶驢瘦嶺病人生入鬼門關病人甘作五溪卧
老馬猶思十二閑

上南陵坡

知命

風餐水宿六千里蛇退猿愁百八盤上得坡來摠歡喜
摩閭依約見峯巒

謫居黔南五首

摘樂
天句

相望六千里天地隔江山十書九不到何用一開顏
霜降水反壑風落木歸山冉冉歲華晚昆蟲皆閉關
冷淡病心情暄和好時節故園音信斷遠郡親賓絕
山郭燈火稀峽天星漢少年光東流水生計南枝鳥
冥性齊遠近委順隨南北歸去誠可憐天涯住亦得

山谷集卷五